

ত্রিপুরা সরকার  
তথ্য ও সংস্কৃতি অধিকার

\*\*\*\*\*

স-৫১৩৩

শান্তিরবাজার, ১০ মার্চ, ২০২৪

শান্তিরবাজার উচ্চমাধ্যমিক বিদ্যালয় মাঠে গ্র্যান্ডস্ট্যান্ড ও গ্যালারির ভিত্তিপ্রস্তর স্থাপন

গ্রামীণ এলাকার ক্রীড়া প্রতিভার বিকাশে সরকার  
উন্নত ক্রীড়া পরিকাঠামো গড়ে তুলছে : মুখ্যমন্ত্রী



গ্রামীণ এলাকার ক্রীড়া প্রতিভার বিকাশে সরকার উন্নত ক্রীড়া পরিকাঠামো গড়ে তুলছে। রাজ্যে ক্রীড়াক্ষেত্রের মানোন্নয়নে সরকার বিভিন্ন পদক্ষেপ নিয়েছে। আজ শান্তিরবাজার উচ্চমাধ্যমিক বিদ্যালয় মাঠে গ্র্যান্ডস্ট্যান্ড ও গ্যালারির ভিত্তিপ্রস্তর স্থাপন করে মুখ্যমন্ত্রী প্রফেসর (ডাঃ) মানিক সাহা একথা বলেন। এই গ্র্যান্ডস্ট্যান্ড ও গ্যালারি নির্মাণে ব্যয় হবে ৯ কোটি ২০ লক্ষ ৬৯ হাজার টাকা। অনুষ্ঠানে উপস্থিত ছিলেন যুব বিষয়ক ও ক্রীড়ামন্ত্রী টিংকু রায়, সমবায়মন্ত্রী শুল্কাচরণ নোয়াতিয়া, দক্ষিণ ত্রিপুরা জিলা পরিষদের সহকারি সভাধিপতি বিভীষণ দাস, বিধায়ক প্রমোদ রিয়াৎ, পুরপরিষদের চেয়ারপার্সন স্বপ্না বৈদ্য, জেলাশাসক ও সমাহৰ্তা ডাঃ সিদ্ধার্থ শিব জয়সওয়াল প্রমুখ। অনুষ্ঠানে সভাপতিত্ব করেন দক্ষিণ ত্রিপুরা জিলা পরিষদের সভাধিপতি কাকলি দাস দত্ত। স্বাগত বক্তব্য রাখেন যুব বিষয়ক ও ক্রীড়া দপ্তরের সচিব ডঃ পি কে চক্ৰবৰ্তী।

অনুষ্ঠানে মুখ্যমন্ত্রী বলেন, ক্রীড়াক্ষেত্রের মানোন্নয়নে সরকারের বিভিন্ন উদ্যোগের ফলে জাতীয়স্তরের খেলাধুলায় রাজ্যের ক্রীড়াবিদ্রো সাফল্য পাচ্ছে। ২০২৪-২৫ অর্থবছরের বাজেটে ক্রীড়াক্ষেত্রের মানোন্নয়নে ৬.৫ হাজার কোটি টাকা বরাদ্দ রাখা হয়েছে। উন্নত ক্রীড়া পরিকাঠামো ও ভালোমানের ক্রীড়া প্রশিক্ষক না থাকলে খেলাধুলার উন্নয়ন ও প্রতিভার বিকাশ সম্ভব নয়। তাই সরকার এই দুটি ক্ষেত্রেই গুরুত্ব দিয়েছে। বাধারঘাট স্পোর্টস কমপ্লেক্সে অ্যাথলিটদের জন্য উন্নত সিস্টেটিক ট্র্যাক নির্মাণ করা হয়েছে। রাজ্যের জেলাগুলিতেও উন্নত ক্রীড়া পরিকাঠামো গড়ে তোলা হচ্ছে। আজ ধলাই জেলায় ২০০ শয়া বিশিষ্ট যুব আবাস নির্মাণ করা হয়েছে। গোমতী জেলায় স্পোর্টস কমপ্লেক্সে গ্র্যান্ডস্ট্যান্ডের উদ্বোধন হয়েছে। মুখ্যমন্ত্রী প্রফেসর (ডাঃ) মানিক সাহা আজ শান্তিরবাজারে ইউনিটি পার্কের উদ্বোধন করেন। এই পার্কে মুখ্যমন্ত্রী সর্দার বল্লভভাই প্যাটেল ও মহাত্মা গান্ধীর পুর্ণাবয়ব মূর্তির আবরণ উন্মোচন করেন। শান্তিরবাজারে ইউনিটি পার্ক নির্মাণে ব্যয় হয়েছে ১৬ লক্ষ ৬৮ হাজার ৪৫১ টাকা।

অনুষ্ঠানে যুব বিষয়ক ও ক্রীড়ামন্ত্রী টিংকু রায় বলেন, রাজ্যের সার্বিক উন্নয়নের পাশাপাশি ক্রীড়াক্ষেত্রের উন্নয়নেও সরকার বিভিন্ন পদক্ষেপ নিয়েছে। এতে ক্রীড়াক্ষেত্রে সাফল্যও আসছে। সমবায়মন্ত্রী শুল্কাচরণ নোয়াতিয়া বলেন, গ্রামীণ এলাকায় অনেক ক্রীড়া প্রতিভা রয়েছে। তাদের প্রতিভা বিকাশে আগামীদিনে এই গ্র্যান্ডস্ট্যান্ড ও গ্যালারি গুরুত্বপূর্ণ ভূমিকা নেবে।

\*\*\*\*\*